

23 JUN 2003

Shahidan-Pemikiran

PENUBUHAN PUSAT PEMIKIRAN DR MAHATHIR DICETUS SEJAK 1997, KATA SHAHIDAN

KANGAR, 23 Jun (Bernama) -- Idea penubuhan Pusat Pemikiran Dr Mahathir yang yang akan ditubuhkan tidak lama lagi sebenarnya sudah dicetuskan oleh sekumpulan tokoh korporat negara sejak tahun 1997 lagi, kata Menteri Besar Perlis, Datuk Seri Shahidan Kassim berkata

Menurutnya, kumpulan itu bukan sekadar mencetuskan idea tersebut, malah juga sudah sepakat untuk berusaha mengumpulkan dana bagi tujuan itu.

Beliau berkata, kekaguman, keyakinan dan rasa syukur kumpulan itu terhadap dasar-dasar ekonomi Perdana Menteri, Datuk Seri Dr Mahathir Mohamad telah menimbulkan ilham kepada mereka untuk membentuk institusi tersebut.

"Umno hanya akan menjadi pelopor bagi cetusan idea itu," katanya kepada para pemberita di pejabatnya hari ini.

Shahidan yang juga Pengerusi Badan Perhubungan Umno Perlis berkata walaupun beliau dan Pengerusi Badan Perhubungan Umno Kelantan, Datuk Mustapa Mohamed membangkitkan perkara itu pada perhimpunan Umno baru-baru ini, namun ia bukan cetusan idea mereka berdua.

Sabtu lepas, Timbalan Perdana Menteri, Datuk Seri Abdullah Ahmad Badawi mengumumkan persetujuan kerajaan untuk menubuhkan Institut Pemikiran Dr Mahathir sebagai tanda penghargaan negara dan rakyat atas jasa, sumbangan serta perkhidmatan beliau kepada negara.

Shahidan yang enggan mendedahkan nama tokoh korporat terbabit atau jumlah dana yang sudah terkumpul berkata mereka terdiri terdiri beberapa tokoh korporat bukan Melayu yang sentiasa mengagumi Perdana Menteri.

Sementara itu, Shahidan hari ini telah melawat seorang anggota pergerakan wanita Umno kawasan Kayang, Badrishah Bahari, 38, yang rumah sewanya musnah dalam kebakaran pada 18 Jun lalu.

Dalam kejadian pada kira-kira pukul 8.30 pagi itu, Badrishah, seorang suri rumah sudah berada dalam sebuah bas sewa khas untuk ke Kuala Lumpur menjadi pemerhati pada perhimpunan agung Umno apabila dimaklumkan mengenai rumah sewanya itu.

Shahidan menyampaikan sumbangan peribadi sebanyak RM1,000 kepada Badrishah dan berharap wanita itu bersama suami dan tiga anaknya yang kini menumpang di rumah jirannya supaya bersabar.

-- BERNAMA

AD AZH